

吳
興
藝
文
補

吳興藝文補卷之十七目錄

岳飛

乞催湖州賜米奏

沈與求

德清人

親征詔

辭免除吏部尚書奏狀

辭免除叅知政事劄子

謝賜御書車攻詩劄子

乞出第六劄子

辭免除同知樞密院事劄子

賀賈舍人啓

賈安宅烏程人狀元

賀新守盛學士啓

賀湖守葛待制啓

名勝仲

賀盛守再任啓

湖州德清縣重修孔子廟碑

朱夫人墓誌銘

安吉人

朝請大夫盛公行狀

盛允升寓公

李彥頴

德清人

龜溪集序 龜溪沈與求別號

程俱

懷忠辭 并序。爲郡守顏魯公

陸道士贊 卽修靜

張綱

劉岑除刑部侍郎制 劉岑見前

沈與求知鎮江府制

劉岑除吏部侍郎制

盧法原除端明殿學士川陝宣撫副使制 盧法原秉之子

劉一止除祠部郎官制 劉一止歸安人

除侍郎舉葛郊自代狀 葛郊歸安人勝仲孫

胡仔 寓公

讀寇萊公集

劉岑

向子恣墓誌略

勾詠

于祿字書後記

吳元美 郡教授

重刻吳縝二書跋

爲刻書郡庠

莫濬

葉夢得行狀略

沈長卿

歸安人

靈應廟碑記

汪應辰

賜顯謨閣直學士荆湖南路安撫使沈介招討三

衙軍兵獎諭詔

沈介德清人

成無玷

武康人

南湖水利記 時爲餘杭丞

五畝塍銘

胡珵

常州興繕子城記 爲歸安俞侯

王十朋 郡守

湖州到任謝表

與溫守莫郎中 伯虛 啓

答劉大諫啓 劉度長興人

答湖守陳郎中 之茂 啓

答温州莫守

伯虛啓

答莫守賀冬啓

答沈運使樞啓

沈樞安吉人

答沈待制調啓

沈調丞相該兒

與沈尚書啓

與劉察院

度啓

曰義堂銘

爲歸安莫濬

湖州謁文宣廟文

謁顏魯公祠文

祭安定先生文

莫冲

君陳曾孫

安遠軍節度使龍神衛四廂都指揮使御前諸軍

統制特授太尉殿前副都指揮使制

試題

葛勝仲

見前

陳簡齋詩序

簡齋名與義郡守兼寓公

仲并

郡倅

爲湖州妓楊韻生日作醮詞

費衮

讀孟東野詩

李廷忠

賀章同知除叅政啓

章良能歸安人

章淵

郡守援之孫援寓居長興

蔡簡贅筆序

莫仲珪

君陳孫

修淨土法門後序

吳興藝文補卷之十七目錄終

吳興藝文補卷之十七

烏程董斯張遐周彙編

閔元衢康侯叅輯

韓千秋聖開增定

乞催湖州賜米奏

岳飛

武功大夫昌州防禦使通泰州鎮撫使兼知泰州臣岳
飛狀奏近奉聖旨於湖州封樁米內支撥五千碩應副
本軍起發臣與士卒同被如天之賜昨所差般運人回
據本州知州趙子璘却稱本州未曾承准朝廷指揮不
肯應副卽目新任所在各有金人占據切慮有失事機

伏望聖慈行下本州依已降指揮裝發庶幾卽得前邁
以修疆場之職謹錄奏聞伏候勅旨

親征詔

沈與求

朕猥以寡昧屬茲艱虞迫臣民愛戴之誠續正統於將
墜痛父兄播遷之難履尊位以何安夙夜以圖策慮並
用豈不能躬擐甲冑親冒烟塵乘將士欲戰之心慰黎
元厭亂之意然以兩宮萬里一別九年覬迎鑾輅之還
期遂庭闈之奉故暴虎馮河之怒敵雖遲於克殘而投
鼠忌器之嫌朕寧耳於屈辱是以早辭厚幣遣使通和

庶殫孝悌之思必徇哀恫之請至於土地梗絕生齒流
離師徒懷暴露之憂閭里起驛騷之歎繇朕不德嗟彼
何辜仰懷故國之廟祧至於賁涕俯見中原之父老寧
不汗顏比得敵疆之情稍有休兵之議而叛臣劉豫懼
禍及身造爲事端間諜和好信逆雛之狂諄率羣偷而
陸梁借彼援師倚爲滅勢簽我赤子脇使征行涉地稱
兵操戈犯順大逆不道卒至於斯警奏旣聞神人共憤
猛士在列怒髮上衝以謂逆順之理旣分勝負之形可
見皆願挺身而效死不忍與賊而俱生朕乃下詔總師

卜日引道前驅方戒積陰頓開天地鬼神罔不助順將
帥輔弼罔不協心今朕此行士氣百倍雖自纂承之後
每垂舉措之方尚念祖宗在天之靈共刷國家累歲之
恥殪彼逆黨成此僞功載惟風霜跋履之勤仍蹈鋒鏑
戰爭之苦興言及此無所措躬然而能建非常之功必
有不次之賞初詔具在朕不食言

辭免除吏部尚書奏狀

沈與求

右臣伏准尚書省劄子奉聖旨除臣吏部尚書兼權翰
林學士日下供職者聞命震驚同知所措竊以天官六

卿之長銓綜人物地極高華祖宗以來惟是詢求一時
碩德宿望之士命使居之故夷夏知名縉紳動色朝廷
之上自然尊榮就非其才寧若虛次僞緣恩睠輕以假
人公言沸騰必至累國况復兼官翰墨備極政事文章
之選尤不可不慎也伏念臣迂愚朴拙一無寸長遭遇
聖明誤叨器使待罪言路首尾四年雖有拳拳愛君之
心祇罄孤忠不爲身計然智識凡下昧於幾微何補事
功徒積仇怨仰恃日月之照幽隱必臨直道徑行不避
讒謗終緣思慮過當氣血衰殘涉秋以來十日九病適

以迫近防虞之際未敢祈閑遽蒙聖恩橫加庸品超躡
衆俊併冒寵除在臣之愚豈遑安處况臣少時學爲場
屋之文隨衆覓舉旣忝祿仕舊學已忘白簡之詞不拘
音節尚猶牽彊累日僅乃成章退省荒疎常懷跼蹐今
復假之禁林之直尤非所堪閣筆含毫何以塞責不免
披瀝血誠仰干君父伏望陛下特軫天慈追還成命除
臣一在外宮觀差遣俾遂小休以安素分不勝幸甚臣

無任

云

云

辭免除叅知政事劄子

沈與求

臣今月二十八日准尚書省劄子奉聖旨除臣叅知政
事日下供職者臣聞天下多事則聖哲馳驚而不足天
下無事則庸夫高枕而有餘比自中原震蕩以來天下
可謂多事矣陛下焦勞求濟八年於茲更用大臣無論
數十終未能仰副聖心迄至於今國勢未振陛下當宁
慨然念治愈切宜於是時得瓌璋卓絕之才以陪輔帷
幄則戡定禍亂容或有期如臣庸愚一無可紀蹤冀華
近日負尸素之慙今日忽蒙恩除擢叅大政驚懼隕越
不知所爲儻或冒寵貪榮不自上列顛隳累國所繫非

輕伏望聖慈特回淵慮搏求人望改以命之庶幾策慮
設施必能宏濟艱難以克稱陛下知人之明天下幸甚

臣無任

云

云

謝賜御書車攻詩劄子

沈與求

臣近蒙聖恩賜臣御書車攻詩今又蒙陛下以臣草芥
賤名特紆宸翰俾獲刻於車攻篇末託於不朽奎鉤爛
然光動心目臣之榮幸殆絕一時自顧么微豈能稱塞
拜賜之際感涕交頤仰惟陛下方修復古之政以圖攘
狄之功而臣猥以空疎待罪近列策慮無取宜在譴訶

拜此殊私以慙以懼惟是畢命夙宵以贊中興之業則臣之志也何敢言報臣無任云

乞出第六劄子

沈與求

臣比者荐輸危惴冒犯宸嚴乞解政機除一在外官觀差遣伏蒙聖慈再降中使宣押赴都堂治事恩眷優渥不替初終報効莫從唯知隕涕伏念臣頃繇孤遠遭遇聖明感於知憐思所奮勵常謂議和避地恐成微弱之形積粟練兵審圖恢拓之計念芻言之曲折荷天語之褒嘉志在必成期於協濟而臣終緣拙直動致忌嫌適

偶相臣奔赴行闕惟是人情詢懼之際莫聞國論安危之幾名曰叅陪實均責任踈外若此尸素何安惟恃保全之恩未至顛隳之地俯仰循省夙夜驚慙是以不避瀆煩備陳覲縷仰祈睿聽曲賜矜憐授以官祠投之散地庶欲全於國體豈敢恤於身謀拳拳愚忠莫盡於此臣無任云

辭免除同知樞密院事劄子

沈與求

臣准尚書省劄子正月二十一日三省同奉聖旨除臣同知樞密院事仍降中使宣押赴院供職者聞命震驚

罔知所措竊以輔臣之任國論所資況當用武之時尤
重本兵之寄欲贊能事宜得偉人庶協成謀用戡多難
如臣資材凡瑣性識瞢昏智慮不足以度萬事之宜權
略不足以應一時之變頃蒙聖獎擢與政途昧於謀國
已試無能久冒殊榮曾微薄效陛下略其碌碌尸位之
罪察其拳拳憂國之誠得請外祠甫踰旬月遽頒召節
趣侍經帷旣獲望於威顏卽再申於愚悃覲收蹤跡復
返丘園豈圖異除薦及庸品承命之次顫汗憂惶臣疾
病交攻衰殘日迫儻或更叨委任必誤睠知伏望陛下

特軫深慈追還成命疇咨人望用厭輿情庶資經濟之
謀以成恢復之業臣無任云

賀賈舍人啓

沈與求

伏審茂膺詔檢寵進詞垣聯侍從之榮班極文章之盛
選音騰疾置光勳故鄉恭以某官學配古人才高當世
早馳妙譽擅滄海之遺珠獨冠賢科應崑山之片玉用
先諸老擢自一人校讎兼六籍之微刊正盡羣言之失
踐揚滋久聞望益隆進直螭坳記載之功唯允首陪鵷
戟調護之德攸全爰從禮樂之司入掌絲綸之地舍人

樣有如此大手筆無甚難紅藥裁詩暢中和之遠韻紫
微草詔追顥噩之醇風紹蘇賈之才名超伊管之相業
乃符輿論亦出家聲某蹤跡陸沉音塵斗曠側聞成命
之出彌增末契之榮目想俊游輒起彈冠之興心懷美
廕尤傾賀厦之誠

賀新守盛學士啓

沈與求

伏審細札疏恩左符分命起自列僊之館來臨多士之
鄉芹藻生輝布韋增氣恭以其官剛明蓄德端厚凝姿
粲然星斗之文粹矣珪璋之表賢關闊步早收俊造之

科仕路橫翔遂入英雄之轂乘輶擅膚使之譽列棘聳
名卿之稱醞藉有餘於風流緣飾無先於儒雅一昨辭
榮北闕均逸南州田里絕歎息之聲治功藹著庠序修
孝弟之義名教勃興集此美談發於遺愛况蘭陵之孔
道接茗水之上游喬木相望稔服善鄰之教令甘棠具
在飫聞雅俗之歌謠用是此邦絃誦之徒思見我公色
笑之樂茲聞除目實激懽悰顧惟齋鹽之冷官曾是門
闌之下客燕雀相賀同看大厦之蔭成桃李方華獨認
舊蹊之路穩依歸扑躍倍萬等倫

賀湖守葛待制啓

沈與求

比審高牙已臨大府寬條一出驪頌四馳恭以某官心
存古人氣蓋當世名號一時之豪傑學爲四海之宗師
兩禁同游最先德舉八科並中豈止文鳴上心雅欲其
居中時論久嗟於補外然公卿皆憚徒以君嚴之立朝
而吏民不欺亦賴長公之治郡遂請便安之地用蘇疲
瘵之氓正恐賜環不容煖席某頃由絃誦獲進門墻服
在下陳方執簿書之役瞻言故國莫修桑梓之恭依嚮
之誠倍萬常品

賀盛守再任啓

沈與求

伏審祇奉新恩洊臨舊治提封所暨驩頌如初恭以某
官卓犖受才洪深極德道義滿於天下英雄游於轂中
煥星斗之文追古作者起雷霆之譽爲時聞人功有爲
以皆成治無施而不可輟從棘寺出領竹符千里興謠
坐見流亡之復朞年報政騰聞課最之優妙達睿聰併
崇徽數稍緩韓侯之入覲姑狗寇恟之借留善政流風
民自安於教冷深謀至計帝亦俟於咨詢會有追鋒不
容暖席故惟踈賤叨辱知憐方懷勿翦之思更勵必恭

之戒依歸下悃倍百常情

湖州德清縣重修孔子廟碑

沈與求

予少時嘗聞諸長老言吾邑初脫五季之亂人樂更生
敦朴力穡未知學也大中祥符間予從祖書記始以儒
學中進士甲科名稱籍甚鄉黨榮之邑之子弟遂風勸
於學其後正議大夫盧公父子踵取各第翱翔要途而
學者日寢以盛故有孔子廟基下制狹旣不足以揭虔
妥靈而衿佩野逸弗克羣處迨明道壬申之歲河南竇
克來是退訊之邠人以爲餘不溪來自天目之山注於

邑之東南兩山挾之秀氣橫出宜益有縉紳之祥乃作
今廟直與之隅高明亢爽非復舊比而文雅之士班班
出焉闕闕相望若應厥卜予結髮亦肄業其中絃誦之
聲猶可想也中間朝廷典學而有司便事僅於舊宇丹
堊而已矣然自初考卜迄今百有三年而墻屋頽圯草
莽於堂廟貌雖存丹青缺落使人喟然有寧不嗣音之
歎春秋祀事著於令甲而器幣牲牢之薦弗備弗蠲神
用不享大末鄭如幾隱居溪陰一日過予曰吾儕僞服
顧不若佛老之徒嚴奉其祠以侈大其師之說恥也已

而率邑子沈良能相與告於邑令楊鏐及凡境內之士
大夫士大夫悉勸趨之爭出緡錢以佐其費乃盡徹去
門廡更立而一新之面勢隅落雖因其故而棟楹顯敞
視昔則又加焉爰卽兩廡析爲齋廬以待學者中巖廣
殿像設巍然翼翼羣公繪事惟序觀者爲之屏息嗚呼
休哉實經始於紹興癸丑之仲冬越明年春上下行釋
奠之禮落成焉是日也予兄次律攝衣升堂談春秋大
旨凡邑之士大夫濟濟在列咸有肅容邑令跽而請予
文以記予謂國家遭強胡之難義士枕戈武略是急然

未嘗斯須忘右文之事誠謂舍是則無以爲天下也吾
邑令乃能間搶攘之餘導人所欲立學崇祀以夸四方
是可嘉已乃爲書其本末而系之以詩曰

餘不之源來自天目注之兩崖其勢若束惟邑東南山
崇水湫始建廟宮茲焉考卜士也來游文風載郁更時
搶攘園蔬是鞠豈其山川秀氣回復厥有吾徒輸金委
粟載新棟楹玉靡程督有神司之不疾而速揭揭元聖
端冕袞服羣公從之祀事孔肅嗟我令尹崇化表俗曰
與自躬往繼前躅勉我士子荒迫則辱惟以嗣音豈惟

千祿祥源泱泱庶來其續

朱夫人墓誌銘

沈與求

夫人朱氏世爲湖州安吉人父繹太廟齋郎自其曾高
以來號以貲雄於鄉然儒服蟬聯素風甚飭夫人幼而
莊靜整整有家法父母愛之爲擇良配得同里潘侯師
仲歸焉夫人之歸逮事其姑能先意順適卒以孝婦稱
於族黨之間事其夫恭謹如待遇嚴賓客娣姒雍雍怡
怡如也潘侯少小喜自振拔其交游多四方才士大夫
館穀如歸至傾家不問絲竹之娛帷帳豆觴之具必極

精腆夫人職之也歸十年生三男子曰巳曰莘曰蕢
侯卒時夫人盛年既終喪宜改適夫人聞之慟絕自誓
弗許然二子甫勝衣其季在襁褓未能誰何也夫人克
奉潘氏祀字其孤有幽閒淑慎之操三子既稍長知事
夫人一日斥奩中物幾所於庭悲泣不自勝呼三子侍
傍且誨之曰汝父平生時缺意欲立門戶非苟然者不
幸棄諸孤蚤世吾哀亡撫存雖掬窮不懈吾心固有處
也今汝曹齒宜學其以詩書起家成汝父志顧何以簋
金爲其爲汝資勉之哉三子相持泣謹諾卽招聘四方

知各士館之門下授以儒術如誓云三子資秀發巍然
可喜也爲學務自刻苦在儕類中嶄嶄見頭角贊遂一
舉中乙科授廸功郎調高郵軍司兵曹事迎夫人之官
下會芭及華由鄉薦肄太學夫人旦暮念之不衰贊乃
奉安輿西游上都以娛其意旣至而贊小疾不起夫人
以客樞歸卜居郡之西園曰吾不忘故里顧吾廬贊兒
時戲劇及其起居寢飯處歷歷在眼中吾不忍昧也汝
曹脫有立庶幾釋吾此哀不然無以吾歸二子奉夫人
訓相戒語激昂益不懈客有相過夫人從屏間閱之其

人賢卽色喜語諫而意嫚輒禁切不相還往故所與遊
多益者亡幾何莘亦相次中第授迪功郎調衢州西安
縣尉歸拜夫人於堂下夫人疾已侵攝衣強起一眎之
歎曰吾嫠居三十年矣天卒相吾二子俱成名芭故未
偶度其趣操宜不墜厥家吾死何憾夫人疇昔嗜內典
因索其書目誦之彌月忽若有得默然宴坐瞑目而逝
其了達死生雖學佛之徒自以弗逮實建炎戊申十二
月十九日也享年五十有三有孫男六人曰梅曰楫曰
楹曰格曰權曰相孫女三人皆幼越明年九月某日諸

孤奉夫人之喪歸葬於邑之東山鳳亭之岡將葬諸孤
載夫人語泣請銘於予予謂人爲善惡不力誠力未有
無其報者夫人志節終始凜凜不可奪烈丈夫有愧焉
身見二子躡取名第起爲縉紳家天之相其爲善獲報
豐矣鍾誦之祿顧不能一朝享之殆其賦予然耶茲亦
可悲也已三子少從予游且夫人行應銘義不得辭乃
爲之銘曰

其殖也豐而用之冲不贏其躬其節也正而持之定不
隕其性此古烈婦之所難而夫人能然得不爲賢也耶

是宜神者報之用錫爾祉迄成厥家克昌厥嗣鳴鳳之
岡喬木蒼蒼銘詩孔昭百世之藏

朝請大夫盛公行狀

沈與求

盛允升字德常其先餘杭人公之四世祖蟠徙建德公
父僑直集賢院知越州集賢公宦游吳興樂其山水因
家焉公資稟端亮自少小屏絕嬉弄力學問道古今屹
然如成人稍長喜爲文辭采贍蔚以集賢公蔭補太廟
齋郎調開封府酸棗縣主簿未赴會集賢公捐舍館護
喪歸塋潤州秩滿奉太夫人還居吳興屬歲饑盜斥境

內州將病之先是烏程尉闕正員檄公攝領且語之盜
公分曹督捕擇所脅從縱使緣畝而執其渠首械送州
一境帖然州上其事司勲以格進官一等丞蘇之崑山
崇寧元年官制行授登仕郎公之丞於崑山也事有便
於民無巨細輒舉之其非所便不問久近必去乃已代
有期傾邑詣州泣留公再任州不能奪請於朝時上方
建鄉校復里選欲得能臣倚以辦事有旨從之邑舊有
先聖廟庠屋纔數楹公承詔一切更徹根椽寸甍不歛
於民而落成先於諸郡部使者才之聯牘言上三年召

至闕改簽判杭州是時東平呂公惠卿帥杭被旨擇才
吏訪境內逸迹備修九域圖志杭於東南爲大詮次居
多帥難其人比公至喜曰吾事辦矣卽一以屬公公搜
抉無遺事數月書成奏御御遷通判揚州往歲淮甸小
歉春秋二租官所貸緡錢在民者詔悉閤之而強家大
姓貪緣爲姦其非所應閤者詭免甚衆歲且豐猶抵之
不以給上事公具簿最勾稽得實諭使償凡爲錢數十
萬以佐外計遷朝奉郎太夫人壽且九十矣念歲時姻
族燕遊之適在官下心未嘗一日忘吳興公惕然曰吾

始以親故仕今所居非親所好雖食萬錢誼不忍卽解
印韍致其事以歸左右就養惟謹居無何太夫人以壽
終公執喪如集賢公時益不懈政和二年司開封府戶
曹事方朝廷改正徵角二聲庶燕樂以聲章鄭衛淫哇
之習公上所著樂書數萬言論辨古樂所以析用中正
之法甚悉上嘉用之改儀曹兼大晟府製造官三年司
勲奏公曩攝邑蘇之常熟捕獲盜鑄金錢法應賞由是
累遷朝請郎九月燕樂成上命輔臣覆視唯公所製特
妙一時特恩遷朝奉大夫踰月賜服三品皆異數也錢

得請知秀州五年公猶待次鄉郡以大晟奏功還朝請
大夫公請休於家理別圃茗雪之上幅巾藜杖往來其
間澹乎若與世無營者閱祕典日數百紙要以了達死
生人亦初未之知也居數月感疾命諸子具祕器卜壽
藏旣乃曰後事豫矣瞑目何憾卽折簡素所從游告以
逝日至日終于正寢治命不亂其悟解乃如此實政和
六年閏正月十八日也公雅有策畫臨事不爲苟且之
計所至績效藹然有聞於時故所遷官率繇懋賞獨於
榮利恬靜比再挂冠年猶未衰南州士大夫高其行愛

慕在色使公彷彿以進則其所施設何如哉享年五十
有八娶孫氏封宜人子男六人曰康廸功郎婺州兵曹
掾曰度廸功郎坊州司刑曹事曰庚庠庶序皆遊鄉校
爲儒生女七人長適登仕郎朱德延次適廸功郎錢均
次適貢士陳琦次適貢士吳景信次適太學博士錢圻
孫尚幼孫男一人女三人明年三月十四日諸孤奉公
之柩塋於烏程縣九元鄉金蓋山之原先所卜也

龜溪集序

李彥穎

元樞忠敏沈公當建炎紹興間被遇思陵爲耳目股肱

其勲業在朝廷其聲名在天下其節挺挺特立號稱名
臣蓋中興人物之冠冕吾鄉間之光寵也紹興三年由
吏部尚書奉祠歸里門伯氏桐廬丞彥衡字元規自公
在憲府賓客館下與其諸子游雅相好也時彥穎年十
有五學於伯氏早慕見公來館舍相對無雜語論文說
詩疊疊不倦尤喜論體製格律源流所自不務苟作每
從傍竊聞之則知所漸慕焉時方亂定才大夫士游居
郡邑者以十數相與賡唱爲娛樂篇章流傳得輒誦記
其文彙伯氏又能收拾藏於家得以時時覽觀顧

方爲童子雕篆之習他未暇以學莫獲拜下風而請焉
而公益嘗辱撫憐之曰是子可教也未幾詔起公鎮京
口召還仍爲天官掌內制遂持釣樞位貌殊絕無所窺
尋其聲光已剗聞君薨於位矣年甫五十二家在故里
旁無壯子弟平生著述文字故多散落或爲親黨取去
此得於所聞者如此而吾伯氏亦且下世諸子都未省
事凡得公手筆起草與所抄錄在紙者皆亡之雖往還
尺牘無留者惜哉後六十年當紹熙辛亥公之孫訢爲
浙漕始能裒輯類次爲十二卷將以板行於世蓋其家

所存止是矣以序見屬念自少小知敬重公今甲子一
終既篤老矣撫往念舊安能無槩然也公英邁絕人早
以翰墨知名歷三院御史中執法排姦擊邪風采峻厲
觀所作中丞謝表有曰本之以忠厚愛物之誠加之以
正直事君之道故嘗爲之言曰此御史箴也或謂公在
臺中論議少恕是何足以識公之用心視草禁林得代
言體親征詔書凡四方聽聞之者莫不感動流涕庶幾
乎奉天之作此特私愛味之故云爾初衣冠南渡一時
能言之士衆矣當其時儕流之所推稱學者之宗仰如

公者屈指幾人而後來或未之詳也傳世行遠其始自
今公爲不亡矣公諱與求字必先其立朝出處之大節
固載之史官獨始初親見之幸夙昔願學之私因得自
見於此十一月旣望觀文殿學士宣奉大夫致仕吳興
李彥頴序

懷忠辭

并序

程俱

顏公之節不待淮西而後顯此中人以上曉逆順立然
諾者槩能之非公之所難者而其忠義之性乃在於從
容食息之間嘗有愛君憂國之心不以顛沛易其操蓋

所謂招之不來麾之不去如古社稷之臣者方開元天寶時天下久無事縣官自視有泰山之安獻替可否之論不復至於朝廷一旦有緩急相與北面臣賊者皆前日高車大蓋出入廊廟都俞和附之人而伏節死義之臣顧出於疏遠無聞之地其隱然以孤城抗賊鋒者顏氏弟兄而明皇未之識也向使數人者用於朝義冠綬帶而胡人不敢謀矣惜乎公之壯不得爲彼以各一代之良臣不幸白首至大官更肅代德宗世政益紊憂益深雖搶攘版蕩之際而常持憲秉禮尊王守官曾不爲

少貶其倦倦之意豈惡安逸而樂羈危誠忠義激於內也公之言行益危而嫉公者益急自乾元後遽斥醜地歲歷十二辰走半天下中間還之朝席未及煖又襆被而南矣觀其愛君之心如伯奇申生孝於親逐之不忍去讒之不知避之死而無二也忘者知其流離窮餓不足以及懲也則委之豺虎甘心焉其勢必至於此蓋無足驚咤者詩稱仲山甫既明且哲以保其身又曰柔亦不茹剛亦不吐不侮鰥寡不畏彊禦而漢唐末流至假明哲以自便方以柔順緘默爲賢烏在其剛不吐也且詩

胡不曰旣柔且默以保其身哉夫唯明不足以燭理哲
不足以知人而當山甫之任其得全身者幸也若公之
見善勇義殺身成仁其於輕重取舍不旣明且哲乎其
所保身者固存也不如是則是關播盧杞之全合於山
甫之美而賢於顏公之節矣予遊吳興拜祠下肅然想
其餘烈退爲文以頌之名曰懷忠上言公窮而無悶故
能從容是邦適其適而紓其憂遠而不忘君故其憂未
嘗不在王室也中言公不能與世浮沉卒放棄窮極見
笑於頑佞之夫下言公之精誠當與天地長存雖死而

不亡也庶幾千載之不朽幽人志士尚能薦芳洲之蘋醕
茗溪之水歌此辭以祠公云其辭曰

返吾輶兮巴山釋吾懼兮揚瀾歲晚晚兮道阻修望長
安兮未還聊駕言兮出遊攜美人兮山之幽撫雲霄兮
遐觀恨辰莫兮淹留誅蔡管兮出秀寄雅志兮巖丘攀
春洲兮白蘋擢青桂兮冬榮野無人兮誰芳君不御兮
安薦予之潔誠抱流憂兮永歎障西風兮夕塵

其一

辟食兮侯居朱輪兮塞塗世以是爲得兮胡不能保妻
子而全軀狙利兮抵巇鉤時君之嘖笑兮於曉與眉世

以是爲才兮胡獨徑行而不回豈形羣而情異兮何惡
逸而幾危紛肩摩而轍結兮誰不乘君車而衣君衣奚
獨好垂而多事兮恥時之不堯舜與皐夔羌以生而易
義兮幾何而不謂纍之狂癡

其二

孤蠱兮蠅營夜慚景兮晝畏人生奄奄兮俛俛冒無知
兮窖塵展伊人兮超然何虎兕與甲兵患爲骨兮義以
爲軀元如生而血爲碧兮信前修之不誣疑之黷兮蒙
茸顏如丹兮淫腴雖錮九泉而壓崧岱兮亦將馭飛龍
而撫八區與日月兮齊光極河漢兮爭流左吾鸞兮洪

岸右吾歎今遠遊慰吾人之思兮儻復過峴山而稅蘓
洲悵神交兮千載覽陳蹤兮夷猶

其三

陸道士贊

程俱

陸公玄虛寄傲簡寂江湖相忘一笑莫逆

劉岑除刑部侍郎制

張綱

朕惟王政必本於仁恩宜重萬民之命俗吏或牽於私
意靡遵三尺之公肆求時髦俾職司寇具官某性資敏
明而輔以博古之學辨論詳雅而發爲華國之文夙藹
譽於儒林亟躋榮於要路彌綸省闈肅振綱維揚歷道

山蔚高領袖察其更事之久必能議法以情簡自朕心
宜掌邦禁徃攝貳卿之事進聯法從之班爾其端一意
以持平審四方之奏讞民之多辟忍橫被於非辜法無
二門尚參決以古義用廸咸中之慶庶追止辟之風

沈與求知鎮江府制

張綱

朕觀東南形勝之地京口實當上游方茲時巡尤所倚
重思得折衝厭難之士以修古方伯連帥之職用作外
屏寬予顧憂具官某學不守於空言才克施於有政
膺東拔亟寘清華執法憲臺則排姦擧邪紀綱復振率

獨銓部則揚清激濁流品自分玉堂推詞翰之工經轅
轡論思之助以其蓄之有素故能用無不宜久去周行
殊鬱士論是用起從貢館殿此大邦春惟一路節制之
權加以萬旅營屯之寄非威重足以鎮浮則人不服非
惠和足以宣化則下不安徃圖厥功奚俟多訓

劉岑除吏部侍郎制

張綱

朕方肇修銓衡之法付之文部使天下之士咸以資格
聽其考序其職顧不重哉非得夫剏煩治劇之才何以
勝激濁揚清之任具官某學博而有守言大而力行擢

貳秋官掌予邦憲以情論法吏不敢欺信其才高可膺
煩使治官之亞汝宜攝承夫裴馬之能述於史氏後世
稱焉往其懋勉無愧古人是爲任職

廬法原除端明殿學士川陝宣撫副使制

張綱

當險阻艱難之時慮莫先於謀師得詩書禮樂之士庶
相協以圖功矧累朝之舊臣副一方之重寄宜加異數
以撫成師具官某志在古人名顯當世偏饒侍從堂堂
人物之英備罄猷爲蹇蹇王臣之節肆予圖任屬此老

臣會與秦蜀之兵俾貳軍師之收奇謀碩畫自能聯合
於孫吳禦侮伐謀尚何遠想於顧牧顧今方隅之未靖
況復屯戍之久勤盡加寵於使懼庶增重於戎律爰錫
贊書之命亟升祕殿之華斷自朕心克符公論四郊多
壘念方軫於至懷千里折衝其勉聽於遠略

劉一止除祠部郎官制

張綱

朕方舉羣策以收中興之功顧天下士有一善可取猶
將簡拔任用而况已試之才爲朕所知者乎以爾行義
文詞縉紳推仰蚤膺器使入直螭坳嘉其久卽退閑益

自堅於氣節肆以郎選還寘本朝朕之用人不以官職
崇卑而爲輕重往祗厥服以茂遠圖嗣有壅遷毋虛朕
意

除侍郎舉葛郊自代狀

張綱

准令諸侍從官授詔限三日舉官一員自代者

右臣伏覩左宣敎郎葛郊爲學敏明操行廉謹施於政
事所至有聲舉以代臣實允公議謹錄奏聞伏候勅旨

讀寇萊公集

胡仔

萊公集以江南春二首觀之則語意疑若優柔無斷者

至其端委廟堂決澶淵之策其氣銳然奮仁者之勇全
與此不相類蓋人之難知也如此

向子忞墓志略

劉岑

向子忞字宣卿朱丞相勝非以督府請李成於江西屈
公參議有一縣令以不廉被斥方求薦書入幕中公具
以姦賊白丞相俱斥去因論君子小人不可使混雜以
亂政丞相皆納用之

于祿字書後記

勾詠

柳公權對穆宗用筆法曰心正則筆正是言也雖公權

時以筆諫然論書法理固如是余觀顏魯公筆蹟乃知
公權之言不妄魯公忠正人也功名事業列於國史其
全德偉行英風義烈貫映千古文學之外尤工雜書大
小二體筆力遒勁如服介冑如冠獬廌凜凜乎若誚虛
杞而咤希烈有不可犯之勢蓋其心畫所寓誠可畏而
仰之往由左宦臨牧吳興暇隙書千祿字樣鐫刻於石
傳示後生然石刻在刺史宅東廳院傳之惟艱故世罕
得善本而蜀士大夫所見惟板刻尤鮮得其真府君龍
閣宇文公比刺湖州得魯公所書與楊漢公所摹二本

特爲精詳公深喜魯公書於千祿字樣尤致意焉非獨
愛其字樣而且愛其書法之工非止愛其書法而又愛
其心術之正惟愛之篤故惜其久而淪廢於是俾以楊
蜀二本叅校若顏書之刳缺者以二本補焉不可推究
者闕之令適顏書之士摹勒刊石於泮使學者矜式且
欲所傳之廣噫魯公所書實大曆九年自大曆至開成
僅踰甲子石已刳缺姪顥欲移他石不果後劉崇楊漢
公摹勒成顥志時開成四禩也自開成歷五季迄皇朝
距今凡五甲子漢公傳本亦寢磨滅魯公真跡所存纔

十四五爾矧公去郡今復幾載其石存亡不可知幸而存焉無好古博雅君子寶而護之且有風雨摧剥之虞則彼筆蹤或未可保今公再傳茲石雖謂摹刻失真然梗槩猶在學者意解神悟尚庶幾得髣髴於斯抑自公始也紹興壬戌八月旣望梓學教授成都勾詠記

右干祿字書再以魯公石刻校之多所更定惟平聲有箎字在四支韻中是作壘箎之箎當竹下从虎今乃从虎自讀爲虎而非可音池也上聲有愒字在十九皓韻中同爲惱字攷字書惱字別無此體卽恍愒之愒也音

忽夫此帖自唐入宋已經傳刻當時亦云寢磨滅矣况後世苟簡書寫先正之風日遠又安知非烏焉之類乎二字俱誤無疑姑識於此嘉靖丁亥歲春冊陽孫沐書

重刻吳縝二書跋

吳元美

新唐書糾謬二十卷五代史纂誤五卷元祐中故朝請大夫吳君縝所撰君字廷珍成都人熙豐時名公師孟之子歷數郡守俱以惠政聞生平力學博通古今多求前史謬誤而參訂之然未嘗示人間有傳者此二書而已今直寶文閣宇文公時中自蜀來守吳興以郡庠有

新唐書五代史版本而吳君此書不可不附見也遂令
併刻之且俾元美序其後元美曰唐人稱杜征南顏祕
書爲左丘明班孟堅忠臣今觀其推廣發明二子信有
功矣至班左語意乖戾處往往曲爲說以附會之安在
其爲忠也今吳君於歐宋大手筆乃能糾謬纂誤力裨
前闕殆晏子所謂獻可替否和而不同者此其忠何如
哉然則唐人之論忠也陋矣惜乎君之志徒見於其書
也紹興戊午四月望左從政卽充湖州州學教授長樂
吳元美跋後

葉夢得行狀略

莫 濬

宰執奏福建安撫葉夢得指畫弭盜之事上曰盜之竊發多緣守令非人拊克所致宜令帥司條具凡有害於民者除之自此公或招或捕或誘之相戕三策並用

靈應廟碑記

沈長卿

錦山之南有廟巋然峙其趾制度丹雘甚古榜曰三王圖記不載採父老言三王姓陳許辛氏廟故址居山北有靈烏銜鼓至今廟基遂徙焉王昔慕道集隣境神禮唐覺聞禪師聽講梵書故今廟坐之旁諸神環列有僧

居其中皆迂怪不足信庭有斷碑字漫滅不可讀僅可辨者數語曰三王不嗜血食又曰按諸徃古立僅千載則神之廟食遠矣長卿自爲兒時見父老奔走奉祠無虛日水旱癘疫有禱必應建炎四年冬虜師渡江所至屠戮遊騎距廟纔八里居人震恐聚禱於王賊無故自遁會有傳者云賊見旗幟亘數里謂有大軍故去人以爲王威靈潛却之也紹興初工部侍郎李公誼避地來居坎凜未偶一日禱于王獲吉卜不二年果登近從公旣信其靈因里人徐先倪豫有請白于朝焉廟額許之

九年三月賜名靈應制下環境作躍益大其廟作三門
易新榜大合樂以落之用侈上賜明年又作東西兩廡
規制一新廟臨長溪衆流趨滙遠峯環列眺覽奇曠先
是有術者言後數年當益興已而果然以王之靈而依
據茲地其煥發彌遠亦宜哉父老願有記長卿世蒙王
休所不敢辭乃記其事并作迎享送神詩鐫之石其辭
曰神之居兮阻幽依水涯兮山陬祐我民兮自古世旣
遠兮彌修神之遊兮容曳載蘭旗兮桂旂脩周流兮靡
息去螟蝗兮毆疾癘神之歸兮光陸離霈靈澤兮淋漓

配此山今不朽俾民兮深思山有薇兮水有芰潔樽罍
兮薦芳旨秦簫鼓兮鏗鐃春與秋兮饋祀我民奉事兮
無敢不虔神之庇我兮其有不然詔子孫兮無怠彌億
萬兮斯年

賜顯謨閣直學士荆湖南路安撫使沈介招討三
衙軍兵獎諭詔

汪應辰

勅沈介朕常患今之郡縣有所興爲徃徃騷然煩費而
事未必集雖然豈不存乎其人邪卿任分閫之重堅體
國之義招致銳士入備禁旅願從者聽中率者取初不

以一毫擾民而道路云遠糗糧畢具又未嘗仰給大農也嗚呼茲亦可以觀政矣予惟爾嘉之

南湖水利記

時爲餘杭丞

成無玷

苕水發源天目經兩郡六邑以入於具區者二當天目之麓山隘地高水經三邑處其下流水勢奔放不可爲力餘杭縣其間襟帶山川地勢平澈當苕水衝橫流歲嘗一再至久雨或數至倏忽瀾漫高處二丈許然不三日輒平其爲患雖急而難測以禦也故隄防之設比他爲重東漢熹平中陳公爲是邑始築兩湖以爲水渚金

溪者爲南下湖環三十里金山者曰南上湖環三十二里洪流從高赴低其勢悍甚得所謂石門函者則析而匯於湖漑就寬平其暴必殺溪流縈紆徐引而東湖之水洩於南渠河河流而東接東溪五福渠之水以入於吳興其派別而北者爲黃母港十二里與苕溪會於其會處節以石埭曰西函溪流方漲則閉以固東鄉之田俟其稍落則啓函以走渠港之潦下田函乾水不備浸若旱曠開函以灌漑千餘頃膏腴民無水旱號爲沃壤衣食萬室出賦租無慮萬斛而計其爲利又倍蓰也其

爲塘岸規制甚工得周官善防之意歷年寢遠溪湖皆
高隄堰俱圯水或逆行漂沒廬舍西函旣自踈罅守者
貪賂竊以渡舟水因大至官府輒救目前遽塞之以弭
患自函之塞十歲九潦民日益困土脉沮洳殆成棄地
今大夫江公以宣和四年夏來令茲邑徧諏耆舊得溪
湖利病甚詳乃以是年終度王赴事民懽趨之始於西
函次五畝塍次緣湖之岸當溪之衝者曰紫陽灘尹家
塘護郊之堤曰中隔塘次緣溪之岸當石門函之左右
者西踰明星瀆東接廟灣之塘次上湖可洩者南溧河

受水處曰石櫺橋次緣溪之岸當石門函之左曰關林塘南岸皆全矣凡北岸之塘與南對修由西門之外曰五里塘西山之橫隴當溪之衝者曰龜邊塘及東鄉之外盡十四壩之防一皆圖治於是決渠之岸無偏強之患其下流遠郡與錢塘接境之田犬牙制錯而塘在吾邑者曰廟灣曰許家湖曰菱蕩塘曰塘口曰蜃塘曰化灣與夫石瀨曹橋之間十餘壩之岸亦皆增葺凡堤防之設西函爲最大夫躬行勸相以撫循之堅厚精密巖立山峙經始十二月甲寅落成於明年三月己巳其高

七仞其長一百三十丈兩崖橫敞其中開閉處小隱縱
陋度敞相去尋有半加膚寸焉故石之工九百九十役
庸萬有六千三百用緡錢四十三萬皆函下之氓計畝
樂輸足用無贏不愆於素函成遠邇縱觀愕然歎服諸
儒爲文作詩以紀頌之者五畝塍者蓋爲巨防今不盡
復水無可趨齧中隔塘且爲城邑病故今五畝塍之側
其高下僅可隱人其長止四百九十五尺其北田岸漸
高屬於山足者凡五百尺下於塍尺許皆空不築湖水
過五尺盤塍北空處以流過六尺則盤塍以流水之流

墜下至五尺溪流平則五尺之水自石門函還納於溪而湖水盤墜者勢緩不爲東郡及南渠河患後民因湖之塞稍耕其田利水之速去也故隄防有盜決者徃時湖與溪皆有塘長免其差科俾專繕治旣而役之如皂隸然又常以假人民厭苦疲久而禁戒寢弛墮者弗增闕者弗補蟻蛀鼠穿獺龜之穴漫而不訾者水至則潰今稍復增置塘長而蠲其役又於五畝墜舉條令爲約束以絕盜決之弊民之蒙惠無窮陳公名渾有王號不知封爵所始宣和五年四月癸巳記

五畝塍銘

成無玷一

湯湯茗水發於天目兩湖灌輸歲堙爲陸漲流時至雲
日蕩沃旁合百源匯於山足勢溢以傾怒濤奔感高卑
之際歲維板築拓基五畝隨潤北屬水溢乃流如槩諸
斛蓄洩得宜高下成熟自塍之壞歲亡半菽茂宰因民
無廢不復慮始云難勸趨判速旣堅旣厚旁郡蒙福咨
爾後人嘉績斯續南湖之陽鳳凰之麓石林崢嶸驚湍
回曲勒此銘詩尚識陵谷

常州興繕子城記

胡程

吳興俞侯爲常之明年紹興四年也且受代爲邑子胡
瑄言曰金人南寇大掠吳楚以歸五年矣常之在淞右
所不燔者十三而子城葢墟焉初子之至也州治寓晉
陵縣治縣治寓佛廬凡官屬邸舍寓民廬倉寓老子宮
學子逃散寓郊廬官軍寓葦廬道傍自金斗以北鬱爲
鬼區狐號燐遊今再歲而官寺廐庫營屯廩庾費宇大
小井井鳩工就功將復厥舊邦人請有紀也願以累子
瑄辭不獲命則告之曰人情樂因陋就簡吏媮弗虔號
爲鎮靜况兵火蕩焚公私耗乏苟持用籍口益可公不

以是故自憚自逸夙宵憂勤卒克以成如初遺後之人
不已恪哉且公之下車也距寇退纔三年嚮之重門麗
譙圭竇空空嚮之冠蓋車馬之衢荆榛成林瓦礫如山
公爲閔閔孜孜弗亟弗遲市廢第於民輦材用之無遠
求以擾也規廢地於官畚環築之無剏增以侈也匠倍
傭故工弗窳徒畚休故役弗病吏不得因緣爲姦民戶
無所輸貸不又惠哉乎柱之雄萬室之豐侯屏中宏吏
舍旁布太倉富之泮宮教之堂序沉沉廉級崇崇上臨
下承以聽以享不又肅哉詩詠其棠召伯是思羊公之

碑後人墮淚公之爲是邦也冤獄滯訟多所決平儒雅
文彩不自表襮法而不刻健而不猛猜不肆察寬不弛
防才業如是政化如是諸所興復成績又如是其爲甘
棠大矣然而不時沽名不自伐功姑務興復大略焉後
之人曰是承虜禍屠燬酷烈之餘揀死扶傷以更造是
邦者其爲墮淚深矣凡是咸當得書有考無愧至章程
工役之調度歲月與凡造楹架若干則有司存之案籍
在皆略不書書其勤公庇民之大者

湖州到任謝表

王十朋

遠障承流之循良之善政近藩改命仰覆載之隆私祗
服訓詞彌增感涕伏念臣五年去國兩地分符僥俗浩
穰有難調之巨室夔疆瘠鹵介絕險之烏蠻但思治已
以先人豈忍奪民而生事故田里安其不擾而獄訟由
之稍稀敢曰懷歸實緣多病輒控祠庭之請屢干旒宸
之嚴旣寬斧鉞之重誅復畀股肱之佳郡瞻清光於便
殿展素蘊之忠言謂能卹民蒙天語之見獎徒以自近
佩聖恩其敢忘豈期衰遲有此遭際茲蓋伏遇皇帝陛
下至仁兼被大智難名憐臣守志弗欺其理猶知於惠

養憫臣奉躬匪懈事君或盡於勤勞故此異除華於朽
質臣敢不持循憲度效法京師詠靈沼於真卿深體好
生之德恢儒官於安定益陶善教之風

與溫守莫郎中

伯虛

啓

王十朋

某官天賦材猷家傳吏事籍甚之譽謫謫簪紳聖天子
方以外治爲憂故輟自握蘭出分符竹踐揚中外無適
不宜顧東嘉小郡豈足以屈大賢第以先大監遺愛著
在千里人心甘棠且猶愛之况其子耶民望使君之來
久矣想不勞而治也然朝廷需才方急指日召環行見

臥轍攀轅又如三十載之前舊使君之去也

答劉大諫啓

王十朋

屢上祠章誤得股肱之郡未修竿牘遂觀面目之書緘
來以朋禮失之過某官學貫今古心潛聖賢樂道幾於
屢空養氣本之以直然青藜燭讀異書於蓬萊詠白蘋
詩起清風於茗雪當龍飛乾道之始正鳳鳴朝陽之秋
官居諫垣色正朝路稱堯舜者非無孟子誰與王言指
恭顯者豈乏京房孰若公勇直道而去令名益高爭無
媿於七人貴奚煩於五馬然臧倉存而魯侯不過旣

璿去則李絳必來益輸畎畝之忠往贊岩廊之治某叨
與同舍素蒙異知迹雖隔於江湖心不忘於館閣

答湖守陳郎中

之茂啓

王十朋

拜違一年又半矣千里仰斗之情常在夢寐中也往五
月去國行色怱遽不及以書告違還家許久去郡城稍
遠無雪川便又不獲修敬媿媿負負何以自文不謂長
者不以其愚不肖遠勞誌憶賜以手書盈幅諄諄情辭
備見如前日在道山侍几馬承博約時也喜如之何故
鄉去湖雖遠而知郡政聲籍籍著人耳目比得其子

齊書言晉吏去歲修城今又大忠烈廟皆有碑刻文章
政事於是兩全某謂此乃通才餘事其好善嫉惡之性
胷中耿耿之奇議論慷慨名節凜然當於古人中求之
可也某雖晚進不才辱顧遇良不淺比見送馮圓仲序
復及小人異日遂可託大賢之文牽聯不朽矣圓仲之
去可惜然於出處無媿吾徒之幸元章半月之欸想足
以破顏一好漢如此不容於時何耶杜起莘盡言而去
士論甚休亦一時館閣游從盛事也某屏迹山間足迹
不到州縣闔門二百指飯雖不足亦頗能忍窮有小小

園林足以自適惟猷猷之心惓惓猶前日耳未能棄桴
從游踐送別之語臨紙不勝依依

答温州莫守伯虛啓

王十朋

某官天賦材猷家傳政學掇列星之高選蒞二浙之名
邦况先大夫有遺愛於此州而賢刺史復共理於今日
變千里歎愁之俗繼萬民安樂之謠凡居蔽芾之陰率
被帡幪之賜故茲僥冒端自吹噓

答莫守賀冬啓

王十朋

伏以氣肇黃宮天地之心始見日行北陸君子之道將

亨其官治有先大夫之風民樂賢師帥之政茂對一陽
之復歡騰千里之謠其待次衡門阻趨賓宇遽拜緘封
之賜倍增感愧之懷

答沈運使樞啓

王十朋

符竹濫分方託帡幪之庇鱗鴻遠屆遽頒面口之書盛
德謙光朋緘過厚共惟某官學傳旣濟文繼東陽栢臺
飛半豸之聲蘭省應列星之象七閩持憲了無囹圄之
冤兩地効官潛贊廟堂之畫方聖主重外臺之寄以太
賢居將漕之權洞曉利源錢已流於地上深憂時事虜

具見於目中宣室興思蒼生望起某天資不敏吏事尤疎臺評類韓愈之譏譏治考同陽城之下下罪甚多矣部刺史想必能見容行或使之賢大夫恐不得終事

答沈待制調啓

王十朋

屢上祠章誤得股肱之郡未修竿牘遽觀面目之書緘來以朋禮過於厚某官望隆苕霅世耀貂蟬八詠逸才真隱侯之華胄一門盛事實故相之難兄嘗分浙右之符尤著閩南之績奉真祠之已久奚從縈之尚淹行起老成以慰中外某闕分絕塞地易近藩將入境以觀風

且登堂而問政歸自夔子國幸風波之已逃遊於鄭公鄉庶罪戾之可免

與沈尚書啓

王十朋

易郡而東誤得股肱之重去天非遠喜瞻喉舌之尊行
遂登龍敢先致鯉某官書讀萬卷名登兩科負賈生通
達國體之才有韓子涵泳聖涯之學言無發而不中
最
高北關之書治所至而有聲尤振西州之譽上意每注
於安危之際公色不變於榮悴之交人才甚難今日有
幾况當宁方興衰而撥亂豈重臣可置散以投閑諒與

宣室之恩卽起東山之臥某爲學最淺受知實深賢關
首與於陶鎔詞掖誤蒙於薦引去門墻其已久仰山斗
而不忘行由或使而身竄於夔喜亦可知而鄉遊於鄭
事大夫之賢者竊效古人之居邦就有道而正焉庶幾
君子之好學

與劉察院

度啓

王十朋

伏審光膺宸命榮陟霜臺大用有階善類相慶某晚學
不才濫游冊府獲親炙者幾二年薰溫粹之容稔忠厚
之論知君子所養過人媿僕輩匹夫之賤每蒙推誠顧

遇警策不敏臨行惜別著見顏色既勤飲餞又寵以詩
章誦小小林園意自憐之句覺松菊之有光也逮去數
月夢寐不忘自聞新除喜不自已近朝廷去積年巨惡
大快輿論天下知臺諫之有人矣

曰義堂銘

王十朋

莫君子蒙將漕河北求堂名於過客王某以曰義名之
銘曰部使者之職莫重於計臺居是職者以桑大夫之
心計劉士安之鞭筭爲善理財一於財而不以義特聚
歛之臣爾非特爲民之蠹是亦爲身之災易曰理財正

辭禁民爲非曰義居是職坐是堂而無媿是名者其賢矣哉

湖州謁文宣廟文

王十朋

夫子之道至大而神顏猶苦之緝軼絕塵設教以中善誘循循化被萬世遐邇惟均湖學之盛東南鮮倫風似鄒魯民同蜀閩某受命天子來爲守臣方以政學焉能牧民聞諸夫子學道愛人益以無倦敢不諄諄若夫惟孝爲政勿欺事君嚴恭之節生祠事蹟

謁顏魯公祠文

王十朋

嗚呼百世魯公嚴霜烈日彼何人斯冠面監色公之所
至人懷其德清風凜然尚餘缺畫某昔守奉陽今來雪
川皆公舊治有象貌存視事之初敢不躬謁豈無他祠
敬慕名節

祭安定先生文

王十朋

慶曆皇祐有三巨儒太山徂徠盛不及湖春言此邦如
泗與洙弟子詵詵三千之徒中庸有傳皇極以敷法行
太學化廣寰區諸老先生萬事問胡宮矣道德賢哉範
模國朝之治效在詩書先生之功不在都兪祠宇於泮

松楸在吳歲時上冢冠帶必趨某受命天子來分郡符
官既有守恨莫能俱叅命同僚往奠一壺嗟嗟先生今
也則亡

安遠軍節度使龍神衛四廂都指揮使御前諸軍
統制特授太尉殿前副都指揮使制 試題

莫冲

門下鎮帥閫以宣威夙領連營之重冠武階而命秩式
隆環尹之權眷言禦侮之英宜舉疇庸之典誕敷號厲
允穆師虞具官某果毅而不羣沉深而有守氣節稟金

行之勁爽視險艱韜鈴傳玉帳之奇灼知權變蚤登勇
爵屢奏膚功宜力四方殿价藩而維翰盡護諸將肅師
律以無譁方當息民繼好之時顯著厭難折衝之望恩
加卒伍得平世撫衆之宜義洞神明挺忠臣盡心之節
惟嘉績之旣懋豈褒律之敢稽是用擢從廂部之聯叅
領殿巖之峻彫戈金印列五府以在庭儼道章溝總千
廬而飭衛益重和門之寄用昭將鉞之光於戲漢置南
北軍示不忘於武備唐分左右衛廼肇列於府兵皆倚
重於將臣用增隆於國勢繼體設官之意益堅衛上之

誠可

陳簡齋詩序

葛勝仲

世言詩能窮人唐李太白號謫仙然以樂府忤妃子卒
阨窮不振劉夢得坐種桃句黜連州白樂天坐新井篇
黜佐湓浦孟浩然賈閬仙等輩俱有能詩聲然以詩忤
明皇宣宗終坎壈州縣故言詩能窮人者是爲大驗予
謂詩不惟不能窮人且能達人今夫窮閭挾策之士生
右文世病碌碌無以自表見爾使其能以詞藝達細毛
之視而被華袞之褒則塗轍之升一歲九遷不爲銳孰

謂詩人例窮哉故叅知政事西洛陳公諱與義少踔厲
不羣篇籍之在世者無不讀旣讀輒記不忘政和三年
以上舍解褐分教輔郡益沉酣書傳大肆於詩文天分
旣高用心亦苦務一洗舊常畦徑意不拔俗語不驚人
不輕出也宣和中徽宗皇帝見其所賦墨梅詩善之亟
命召對有見晚之嗟遂登冊府擢掌符璽而進用矣會
兵興搶攘避地湖廣泛洞庭上九疑羅浮雖流離困苦
而能以山川秀傑之氣益昌其詩故晚年賦詠尤工縉
紳士庶爭傳誦而旗亭傳舍摘句題寫殆徧號稱新體

今天子夢想名士以臺郎召還益以詩文被簡注編掌
內外翰年幾何遂以器業預政所謂詩能達人公殆其
一也彼有旌殿閣微涼之句者誠么麼不足道紹興壬
戌毗陵周公夔自柱史牧吳興郡刺裁豐暇取公詩離
爲十卷委僚屬酬校而命工刻板且見屬爲叙蓋將指
前後學而益未公名於不腐在詩有之載色載笑匪怒
伊教又曰有斐君子終不可諼兮賢侯處心一舉而二
美具可無述哉是歲八月旣望丹陽葛勝仲叙

爲湖州妓楊韻生日作

仲 詩

身若萍浮尚乞憐於塵世命如葉薄敢祈祐於玄宰適
屈生初用輸誠曲妾緣業如許流落至今桃李半殘何
滋於苑囿燕鶯已懶空鎖於樊籠隻影自憐甘心誰亮
香爐經卷早修清淨之緣歌扇舞衫尚掛平康之籍伏
願來吉祥於天上脫禁錮於人間悔往修來收因結果
辟纏織履早諧夫夫婦婦之儀墮珥遺簪免脫暮暮朝
朝之苦人之所願天不可誣

讀孟東野詩

費衮

自六朝詩人以來古淡之風衰流爲綺靡至唐爲尤甚

退之一世豪傑而亦不能自脫於習俗東野獨一洗衆
陋其詩高妙簡古力追漢魏作者政如倡優雜沓前陳
衆所趨奔而有大人君子垂紳正笏屹然中立此退之
所以深嘉屢歎而謂其不可及也然亦恨其太過蓋矯
世不得不爾當時獨李習之見與退之合後世不解其
意但見退之稱道東野過實爭先譏誚東野反爲退之
所累惜乎無有原其本意者也

賀章同知除叅政啓

李廷忠

擢自中樞列於次輔由建隆開東西府實處儒英逮元

豐置左右丞預聞政本成憲具有德乃升恭惟某官
社稷所依文武之特爲明主建長治之策識妙神著在
清時成更化之功音諧廟瑟根於所學之純正位乎本
朝而安強一堂坐運於甲兵四塞稀鳴於桴鼓凡茲制
勝之道屬我基宥之臣入捧絲綸贊調鼎鴈九夷八蠻
雖已賓服五風十雨雖已順成想坐退思巖之時猶軫
若納溝之慮使草木無不遂性則日月可與爭光持此
茂勲永居端揆某托身造化傾耳拜除瞻望清明無復
到鈞天之所奉行寬大其敢負玉州之民激此懦衷寫

之桑牘

藁簡贅筆序

章淵

余解官南昌復居南墅艸堂於若溪濱踰七年矣閉關却掃息交絕游屯窶晚境幼稚盈室脫粟屢空斷編自娛矣文有抵牾隨輒是正事或牽連亦皆記載投蒿破簏久而盈積閱視得數十幅不忍與故紙同弃錄爲五卷題曰藁簡贅筆云章淵伯深父序

修行淨土法門後序

侍郎莫仲珪

娑婆苦境也欲脫衆苦必修西方西方樂園也欲生極

樂必信佛言譬如有人行於曠野暮夜昏黑羣賊在後
執持利器競來逼逐四顧旁皇逃避無所呼天叫地誰
來救卹忽遇老父而告之言此去不遠有長者居福德
威勢盜賊不侵樓閣真實快樂自在烟霧所障汝不能
睹汝但決往吾不汝誑其人聞語歡喜踴躍策步高蹶
不復廻顧注目一心更無他想俄頃之間至長者所羣
賊苦惱杳絕蹤跡種種快樂無異所聞彌陀攝受衆生
長者居也安可不往釋迦指導羣迷老父言也安可不
信世之人於西方之說懵不能知比比皆是知矣而不

信信矣而不修修不能力者十亦常八九焉我今重覆
設此譬喻其不知者可以解會而不信不修不力者亦
可加勉矣夫修西方而決願往生者豈有他哉善盡其
力如遇老父於避賊之時而已矣

吳興藝文補卷之十七